

Хор: Любовь Возелова

Шимлаң рут мир ясҥата уталтаты ёх уйтантысат

Ёмвош округ Сургут вош щимац хар нялмет пуш лэцатса

Хон мувев доватан нялмет Всероссийской съезд хоца рут ясҥа па литература няврэмат уталтаты шимлаң мир мохет Овс мув, Щёпар па Халэват Пелак элты яха ёхтылдысат. Щи съезд курк тылась 24 па 25-мет хатлатн верылдыса, нэман Мир доватн улты рут ясҥат емац хатҥ кеша. Аратадан щита ияха актацсат ветсот молтас хоят 28 регион элты, хота шимлаң рут мир хоятлуд улдат.

Там уйтантопса хар Овс мув шимлаң рут мир, Щёпар па Халэват Пелак хон мувев Ассоциация лэцатсалды. Лувел Ёмвош округ Правительство, шимлаң рут мир ясҥат па литература уталтаты ёх Овс мув, Щёпар па Халэват Пелак Ассоциация, общественная организация «Спасение Югры» па Сургутский государственный университет нётсат.

Щимац уйтантыты хар нэман верса няврэмат па энамты ёх уталтаты хоятат кеша. Щи щирн лув потарсат муй мосал яма па туҥа-щира лэцатты шимлаң рут мир ясҥат Россия хон мувев доватан яма уталтаты ураҥна. Няврэмат уталтыты ёх альсат па эталтысат хоты лув ин шоши ясаҥдал энамты няврэмат пилан уталтадат. Холна потарса муй арат па хота уталтыты ёх ант тармал.



Хор: Антон Максаров

Щалта потарсат йиты ох уталтыты хоятат кеша нохшак элатты мосал.

– Там уйтантыты лотн уталтыты хоятлуд альдат хоты лув няврэмат пилн рупитлат, кимет хоятат па худантлат муй хоты рахл ямашак па туҥа-щира уталтыты щир верты, – Ёмвош округ Овс мув шимлаң рут мир хоятат туты нэ (Уполномоченный) Людмила Алфёрова ястал. – Щи вецкат рупитты щират ияха акатдаят па елды китты номас понда, щи тахаята, хота шимлаң рут мир ясҥат волды ёрэматы питсаят. Щиты нумаслуд па шимлаң рут ясҥата онтас верты муцев мосал па няврэмлува хайты.

Муң Ямал мувев элты тохи па нял хоят яңхсат: Клавдия Александровна Слепа (главный специалист департамента образования ЯНАО), Светлана Ивановна Тусида (главный специалист департамента по делам КМНС ЯНАО), Меретя Григорьевна Тусида (ур ясаң уталтыты нэ Сеяха ашкуда элты) па Антон Эдуардович Максаров (ханты ясаң уталтыты ху Горки вош элты).

– Олаң хатадн муң экскурсияя Сургут вош хуват тутдысаюв, потарса муй хоты тата улапса манты питас, хоты вош энамты питас, – Антон Максаров ястал. – Кимет хатадн Сургутской университет хоца муң рупатаев манты питас. Щита кашҥ регион элты ёхтам хоятат докладат альсат па мастер-классат эталтысат. Ма щита доклад пилна па дойдысам, потарсам хоты муң Ъорвош районэвн ханты ясцев уталтылэв па елды тулэв.

Иван Сандрин
ханшам потар

Щаня мув элты улты учёной нэ

Курк тылац хусмет хатадн Ёмвош Обско-угорской институт хоца шоши рут ясҥатн диктант ханшса – «Фронтальный диктант на хантыйском, мансийском, ненецком языках».

Ханты ясаҥна щита учёной нэ Федосья Макаровна Лельхова (Лонгортова) диктант луҥтас. Арпелак диктант ханшты ёх Ъорвош район элты. Ин щита улдат па рупитлат.

Федосья Лельхова кандидат филологических наук па хантэт филология тахайн Обско-угорской институт хоца куцая ул. Ъув 1991 талн Хон Петра вошн А.И. Герцен институтан уталтаты етшамал. Щи щирн лув руц ясаң па литература, ханты ясаң па литература щирн улты уталтыты нэ. Щи юпина лув Финляндия мувн Хельсинской университет кафедра финно-

угроведения хоца хулам тал уталтымал. Ин па елды ханты ясцев кеша онтас тул.

– Там ханты ясаҥ диктант муң яң молтас тал верлэв. Мет олаң пуш муң лувел 2015 талн лэцатсэв. Тампуш ихосьяҥ тала йис хоты муң диктант ханшлуд. Кашҥ тал муң йи потар руц ясаң элты улуд па муң шоши ясаҥдува толмацлуд па щалта диктанта ёхтам хоятлува луҥатлуд, – Федосья Макаровна ястал. – Ма ванттэмн тунял талат элты ёхтам хоятлуд ямашак ханты ясаҥна диктантат ханшты питсат. Хоятат аршак лув рут улапсайдал пелавантты питсат. Па ям щи хун муң ияха уйтантылуд, еша рут ясцевна потрэмилуд, хор верлуд. Холна ма толмацам потардам



Хор: Иван Сандрин

Ямкурта китылылдам па щита хоятлуд ищи ханты ясаҥна диктант ханшлат. Шеҥк ям, хун ясцев нумман тайлэв!

Иван Сандрин ханшам потар

«Дух Авт» газета хольмаң пела вет тадал постас



Хор: Вера Лонгортова

Хыщам лапат шутшаты хатлна Пулцават КЦ «Наследие» нэпек луңатты хатна ханты мир ораңна волаң уйтантопса манас. Дув «Дух Авт» газета хольмаң пела вет тал хоңа постаса. Ши арат тал ханты газета мур элты мир верат, айкедат, монщат ай куртатна па вул васатна олды нэңхэт ораңна хансал.

Мет алаң газета коңа Геннадий Павлович Кельчин лавадсалды, хоты дув журналист ропата ор ях газет эвалт пинтшаслы, щита дув йи лопасна маса айкедат, потрат, монщат понты ораңна. Щиты олман нил лопсаң газет этас. Хантэт мет емаң таха нэмна масды – «Дух Авт».

Тата уйтантыта ёхтам нэңхэт ораңна дув хансам «Щущие» луңатты нэпекал эвалт ван потрыет луңтас.

Итта Геннадий Павлович пенсина ол, дув юканэдды Аллина Кирилловна Яковлева ропытал. Дув ищи ропата вердал пушци лавалтас. Хоты ай куртатна потрат акатман яңхлат, Ямал мув

нэңхэт пуляң потрат хансдат. Тамхатл «Дух Авт» газета холам диалекта хансал: дорвош, Кев сыл, сурханл.

Щёрас холамсат экземпляр лапат йи пус этал. Итта газетая нил нэңху ханты мир щиратпищат савиман па алщищ тувман ропытал.

Ёмвошна мет ёрң кадаңаң нэңхэт акташсат

Кадаң охална навралтысат па нымална нёхамсат, Ёмвошна мет ёрң кадаңаң нэңхэт арталалайт. Ши ораңна дув курк тылащ 27-28-мет хатлданна уйтантылат.

Касты ях ёрдал арталадат, кадаң охална навралтылат па нымална нёхамсат, этгалэд, хоты сара тутьюх охал элты дэлта рахал па тута, охал кирта па тынщаң явалмита.

Кадаңаң нэңхэт ораңна касты хар Ёмвошна 2014-мет тал эвалт верта питса. Мет волаң задача – нэңхэт сэмна кадаңаң нэңхэт ропата нох адамта, мет ар энамты нэңху щита ропытта ат йил. Касты хара нох этам нэңхэт ям майлапсэтна мадайт, щит лонщхопат па тут маты пормасат.

Майдата ёхтам нэңхэт ораңна пасанат аматсайт, хул хасэңк па сараку каварса. Ор хататна лоңемиман мастер-классат хоңа пилташита.



Хор: Вера Лонгортова

Йидап леккар пормас мет ар питал



Хор: vk.ru/ssalehard

Ямал мув леккар хатат сат молтас пормасна мадайт. Пулцават леккар хат ораңна мули нийлѐң молтас пормас нявремат ораңна лотса. Дув кутлална торах мос хор верты С-дуга, Хон дыши мос вантыгы пормас па наркозно-дыхательной аппарат.

Тампус Надым васна пунсты Центр здоровья ораңна, 21 пормас лотла. Дув кутлална биоэлектрической анализатор,

саккар арталаты, давление арталаты па спирометрат. Ши онтасна мосат сара мощатта питдайт па масты партонатна партдайт.

Ноябрьск вас леккар хатна па лапатхощѐң леккар пормас па мебель. Щита нэман дэщатам кроватят па люхытыты порайна тайты пасанат тулайт. Тут нави йидаптан дэщатла, мет хув хойты нэңхэт ораңна кон питал щита хойта.

Аңки-ащи рут ясаң

Муң Россия муеван хоят архорпи рут ясаңан потардат, сот ветъяң молтас кем арсыр аңки-ащи рахал худты. Кашң мур улапсайл па ясаң арсыр. Щишан шеңк ям, хун муң па мур элты па мув леп ясаң элты луңатлуд, вантлуд па лырашлуд. Муң иса рут ясеңев шавиман тайлэв па самлуд хошилдат хун энамты няврэмлуд лув ясеңел ант уйтлэд. Кашң мур дытла, лув рут ясаң елды холна хув ат шаңал па най иты самлуд ат хошмаладды.



Хор: Любовь Возелова



Туңял Россия водаң ун кушаев кат ялап емаң хатадңан постас. Олаңмет хатад, щит – шимал ай мурат емаң хатад, кимет – ай мурат рут ясеңел хатад. Щимащ законат муңев шеңк мослат. Кашң хоят щи постама законат хуват верытал молты верты, моса ялап луңатты нэпек ханшты, моса кино верты лув мурал элты па па верат. Хун муң и юр, и номас яха понлуд

– туп щи порана муң наңк юх иты таксарат. Курк тылащ хольмаң пела олаңмет хатадан рут ясаң емаң хатад постадуд. Ялап тал тылащан Москва вошан арсыр мув элты па арсыр рут ясаңан потарты хоятат яха уйтантысат. Уталдыты лотан Марий Эл, Чувашия, Дагестан, Ямал муват элты хоятат уйтантысат. Кат нопсаң па самаң хоятңан – щит

Самира па Эвелина муң кешаев лэщатсаңан па потарсаңан, муй рахал па мосал рут ясаң ханшты. Ин ванта интернет хуват рахал камн луңатты нэпекат ханшты па лэщатты. Щита тамащ верат моштасув: хоты хор нэхты хора верты, хоты рахал потар сыйна понты, хота рахал хорат каншты, хоты хорат щуратты па па арсыр отата уталдысаюв. Щи верат иса щи кеша ханшам программа хуват оша пайтты рахал. Худам хатад щита уталдысаюв па кашң хоят лув ясаңан, луңатты нэпек лэщатас. Самира па Эвелина щикущ па рут ясаңан потарлаңан, туп дын шеңк дытлайңан, лулан муң рут

Ханты ясаң

Ма ясеңем юраң па тащаң,
Сорайи хун хадал лув.
Хой ястас ма ясеңем кашң,
Ищимет хохадтам сув?
Сот тал-луң муевмна удман,
Ант парас, ант шашмас ил.
Холна лув нэвщаң па тусаң,
Потарты таял лув дыл.
Ясеңем ма пад турама хорпи,
Ванта куш – ант таял кимал.
Хусатна щита лув сорнийл,
Лохна лув щелтамтал ил.
Ясеңем ма соям йиңк иты,
Сухтаты верытал ар.
Верытал хошмалты. Щиты Курэнна дояд хун мар.
Ма ясеңем энма па ула,
Тусаң, па ашаң, па туң.
Потарты ма ханты ясеңем,
Юшенна ар уйта щунь!

ясаңлудан арсыр луңатты нэпек ат этад. Кашң ёхтам хоят шеңк дытал, лув ясаң холна хув ат шаңал, энамты няврэмлуд ат потардат, луңатлат, монщ мутра хуват луңатлат па вантлат. И хоят ищи верытал ар вер рут ясаң кеша верты. Роман Прокопьевич Ругин шеңк мосты ясаңат щит элты ханшас. Там ханшам луңтарал кашң рут ясаң лэщалад. Щишан рут ясаңлуд ат сыяң па сыстам ёхан йиңк иты овлат.

Любовь Возелова ханшам потар

Сорашак айкел моцатты ураңан

«Лух Авт» газета кашң лапат йи пуш этлдыйл. Тухал ишан, ёхаттал унты талаң лапат хащал. Щи веран, сорашак айкелат моцатты ураңан, нынан мосал «Лух Авт» поныдыты айкелат «ВКонтакте» па «Одноклассники» хоща моцаттыты. Щи ураңан там QR-код мохты лоңаты, па муң верыдыты айкелдува ханшлтыяты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты. Муң па, нын вантам айкелдан элты ищи нопсэв тыед-тохел поныдылэв, вантлэв – мата айкелат па муй элты хоятат луңатты лаңхалад. Тумтак ёшна, тумтак курна ханты мир улапсаев ияха понаман елды тулэв, ханты мир ясеңев шавилэв!



ОБЪЯВЛЕНИЕ

Там QR-код хуват лоңаты па вантаты, муйсыр нётосайт СВО хоща улты мохета мадайт. Щи тумпийн нэңлада, няврэмлада, аңкилада па ащилада ищи нётоса вуты рахал.



СЛУЖБА ПО КОНТРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ
+7 (902) 816-11-90
+7 (34922) 3-98-08
ЗВОНОК ПО РОССИИ БЕСПЛАТНЫЙ

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибыльщиками из других регионов возмещаются затраты на проезд от места проживания до г. Салехарда. В период оформления проживания в г. Салехарде и 3-разовое питание предоставляется бесплатно.

ОБУЧЕНИЕ:

- ✓ ОПЕРАТОРОВ БЕСПЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

3 600 000 Р ЕДИНОВРЕМЕННО ОТ РЕГИОНА
до 120 000 Р СЕРТИФИКАТ НА РЕАБИЛИТАЦИЮ

400 000 Р МИНИСТЕРСТВО ОБОРОНЫ
ЗАПЛОНЕНИЕ ВОЕННОГО СОЦИАЛЬНОГО КОНТРАКТА

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО ОТ 225 Т.Р.

«Кочевая семья – 2026» касам



Дорвош район элты касам хоттэл

Надым мува Дорвош район элты «Мужевское» сельскохозяйственной предприятия лунтасты Талигин хоттэл ёхтыдыс. Евгений Анатольевич па Надежда Емельяновна тащ хотан янхдаңан. Нял няврэм энмалдаңан. Кат эвел па похал Васьёханов ашкулдайн уталтылат, ай похиел аңкел-асел пидан касдыман янхал.



Манам касасая лын няврэмлад па рутлад пидан ёхтыдысан. Сит элты Евгений Анатольевич каматса ясаң ястас: «Муң Мужы совхозан кимет хотан рупитлуд. Ма кусая улдам. Бригадайн хут хоят, хол рутат: апсем, упем, хилдэм. Талан хулам хотан улдуд, луңан – катан. Кев тум пелка касдылуд. Ай улдем пора элты аңкел-асем пидан касдыман янхсам. Муң Тильтим курт элты.



Хоттэл хоятлам пидан Надым воша олаң пуш ёхтыдысув. Катра порайн ма вуды ёх емаң хатлата касты сирн янхсам. Пулцаватан катлэм пуш усам.

Олаң хатадан вантопсайн сохлуд, пормаслуд, лэтотлуд альсув. Кимет хатадан нэңат ухал эталтысув, эңкурап ар арысув. Кум тайты порайн ухал, тынсаң вердам. Тал ухал сумат юх элты верда, луң ватухал – хул, сув – сумат элты, хой хул элты. Ин вератты шеңк кум ант шитлам. Сяха, нык охалда, си порайн, ротая омасман, нэхратда. Мосаң молты хоята мосмитад».

Опел – Вера Михайловна Талигина па ус. Лув па каматса ясаң ястас: «Ма хут тал кимет хотан касдыман янхдам, апсема нётдам. Си елпийн Ноябрьск вошан усам, сита хольмаң педа лапат тал телеграфиста рупитсам. Сялта ёхлы йисам. Мужийн яң тал рупитсам. Там емаң хатадан нэңат ухал дэсятсув, тал сохлуд альсув, вантопса дэсятсув, еша якапсув па арэмасув».

Надым вошан вуды ёх емаң мир хоятат ар хорпи касасай чевая семья – 2026» ольпаңат элты ёхтыдыты ханты, ё эталтылат.

Тампуш нийл хоттэл касасув – Приуральской, Дорвош янхты кат ханты семья олаң район Мужы вош Талигин ру Байдарацкой нюрм элты Кли

Надымской район э

Кашц тал Надымской районан касасаятан касты питас. «Кочевая» район Сугмутской месторожден хоттэл ёхтыдыс. Холна хулам кас хантэт актыдысайт, яң хоят касас.

Лозямоват, Мултановат ёх Надым вош пуңадан улдат. «Надым» общетрович Лозямов потар тус: «Муң Н улдуд, тата сэма питсув. Тащан янх вошаң ашкуда-интернатан уталтылд.

Муң кашц порайн туп Надым вош Ты янхты юшев ваншак. Хасям тал верты питсайт, тохи янхты питсув.

Там касасая Виталий Ефимович няврэмлад па рутлад пидан ёхтыл луңтасты ёх, «Кочевая семья – 20 Софья Петровна Ермакова па ус. Л касдыман янхал.

Нэхты хор дэсятсув, альсув, хоть ул. Тайты сохлад, пормаслад в алидысув, ант арысув. Муң улты ты хоят антом. Сишан си вер нох уталтаты.

Тампуш яң ханты касты хоят ту Кушкепа ёхтыдысат, юрдад артылд.



Улапсаёя ёхтылдыйм ханты хоятат

хатлат манты порайн, шоши
н кассат. Кашң тал сита «Ко-
вантопса верла. Округ райо-
ёрн ёх, ур хоттэлат улапсаел

Хантэт элты хулам хоттэл
па Надымской район. Тасян
тахая этсаңан. Сит – Лорвош
т ёх па Приуральской район
моват хоттэл.

Элты улам ханты ёх

верты емаң хатлатан аршак хоят
семья – 2026» касасайн Надым-
ие вуды тащ хот элты Мултановат
ты команда ус. Ёи командайн иса

ской район нум пелакан Ноябрьск
ина кусая улты ху Дмитрий Пе-
Надымской района луңтаслуд. Тата
ты хоятлуд няврэмдал Муравленко
ат.

па вуды ёх емаң хатла ёхтылдылуд.
датан Ноябрьск вош пуңалан ул,

па Татьяна Валерьевна Мултановат
дысңан. Холна «Надым» община
2026» касасая хоятат лэщатам нэ
луд па Ноябрьск вош пуңалан ул,

ы ёхтылдыйм хоттэл улты тахаялан
антопсаёя лэсйтсаллуд. Каш ант
Надым муваң хоятлуд кутан ары-
к адамты мосал. Няврэмат арыты

тдысув. Нэмолды тахая ант этсув.
ысат, емаң хатл вантсат».



Байдарацкой совхозан рупитты хоятңан

Приуральской район элты па ханты хоятат усат.
«Кочевая семья» касасайн Климоват хоттэл касас.
Луд па олаң тахая этсат. Виталий Иванович па Ека-
терина Гавриловна касдыман яңхлаңан, Байдарацкой
совхоза луңтаслаңан. Вет няврэм энмаллаңан.

Виталий Иванович потар тус: «Надым воша се-
мьяеван ёхтылдысув, ийимем па няврэмлуд. Хол муң
пилэван. Холна упам ики – Гаврил Алексеевич За-
труев муң пилэван яңхас. Надым воша олаң пуш
ёхтылдысув.



Хор: Альбина Тырлина

Ма ай пора элты
тасян яңхдам. Аңкем
– Екатерина Андре-
евна Климова, лувела
ярсот тал. Луд холна
таща яңхилдыл, талан
туп. Луңан курган ул.
Талан муң Епседей ёхан
пуңалан дойлуд. Охсар-
ка элты катсот педа
хус километра. Луңан
сярс педа манлуд, хота
Кев етшал.

Худмет тасян бри-
гадира рупитдам. Вуды ша-
виты хоятат ма пилэман
яңхлат. Нял хотан уллуд.
Совхоз вулэт тумпийн, холна
муң ёра вулэт тайлуд. Ялап
тал ёхатты едпийн, вудылуд
луңатсайт. Си порайн па
хуламсоткем вуды мийдысув.



Ин емаң хатлат манты юпийн,
Белоярск воша холна вулэт
хорсацты вошталлуд».

Каматса ясаң холна ийимел
– Екатерина Гавриловна Кли-
мова ясас: «Ма асем па аңкем
касдыман яңхсаңан. Асем со-

вхозан рупитас, заслу-
женной работника ул.
Аңкем – Мария Нико-
лаевна Лаптандер, луд
ур нэ, па тасян яңхас.
Ун похема хольмаң
педа йи тал. Луд па
мин пилэван касдыман
яңхал, аседа нэтал.
Эвиңалуд тайты сохлуд
эталтысңан, арысңан.

Вантопсайн сохлуд,
пормаслуд альсув. Ма
катхосьяң тал элты
ёнтасты питсам. Аңкеман
улаптасайм. Олаң ханшет ёнт-
сам, айт, уншак отат. Сялта
вайт. Си юпийн туп сахат ёнт-
ты питсам. Няврэмдам, пилэм
иса ма сохан лэсйтлалдам».

Елды педа, тасян яңхты ханты хоятлуд Вулэң ёх емаң хатлата ат ёхтылдылат, хорам сохлуд, пормаслуд, улапсаев ат эталтылат.

Округ хуват, ашкудайн уталтыты няврэмат кутн, хой рут яседел уталтал, «Язык наш веками отточен» нэмпи конкурс верла. Там лопасан рут мувев элты приуральской диалектан ханты ясадан няврэмат ханшам потрат пондув. Нын па лудтаты, няврэмдан пидан па ищиты потрат ханшаты.

Рут мувице

Сама тайты Ямал!

Ямал – щит ур ясаң элты тыйс, ма ай. Ма улты мувем щикем тащаң хоятат, щирал, улапсайл тайл.

Муң мувевна ар хорпи хоятат улдат. Щит урат, хантэт, саранат, охалят. Овс мув хоятат катра щиран улдат. Ин энамты няврэмат катра йис улапса ёрэматы питсат. Щит турам партам улапса, ясаң, ур хотат, сохат. Улапса щир.

Лув улапсайл элты Овс хоятата мосал уятты, муң йи мувна улдув. Ма нумаслам, муң семьяев улапсаев шавиты питдэв. Муң мувевна шеңк ям улты.



Хор: Альбина Тырлина

Мария Сязи, Катравош

Ма Овс мувем

Мада давта ма Овс мувем пуляң? Муң патам Овс мувев ищки, щёкат щита кадаң нэңхет элты. Маң ёханат, кеваң муват кутна па кул орат кутна манта луведал масл.

Луңан, товина па так ищки тадна кадаң нэңхет элты щёкат олта. Энамты кадаң нэңхет, онтытел юпина вул ватна олта мандат. Щита олапсэд сэңк щёкат ант ол. Кадаң хатна яңхты нэңхет ищипа хищсат.

Овс мув ванттэвна сэмлув элты сэңк ям. Самлув ямас тарылат. Овс мув кадаң нэңхет элты дытыт па тутсэм мал. Тадаң сэм тутлы орхатна олапсы антам. Луңан па сусн хоятат Овс мув мойлапсэт: рэхат па толхат дылат. Тамащ ищки па патам, ищиты хорамаң муң Овс мувев. Муңев лувел савита мосал!

Родион Шарипов, Зелёный Яр



Хор: Вера Лонгортова

Восты Яр

Ма куртам даял Овс мувна. Лув нэмад Восты Яр. Тата юхат, ор дыпина рэхат

па толхат энамдат. Рэхат па толхат ор ваятна дыдаят, толхат кадаңатна омщаладаят. Сэңк ям тал порайна, камн аттыи рахал сыядата ёкты вордаты тутат. Овс мувна олты ваят элты тадан такан ищки. Ор хат дыпина кадаң нэңхет олдат, щит лув хатэд. Луведал щита олта

хасам. Щи патына лув ямас олдат ор мув дыпина.

Александра Сибарева, Зелёный Яр



Хор: Альбина Тырлина

лэпат нянь. Леккар хат, ёкты хат, хота муң арсыр вер верлув: арылув па монсят эттылдув. Ходна муң нави, сыстам школа тайлдув, хота касаң хатл онтыты ныңатна мадаюв йилап уйтапсайна.

Муң похлув даял Пулцават вош эвалт хув тахайна. Лув дойд Овс мувна. Овс мув мосл савита, щита лаңкет олдат, саврыет наварлат па хорыман олты охсарат, арыты щипкиет олдат. Лувилал муң щипки хатна версалув, дытытна пондалув. Хув па так ищкет олтэдна ант ат дылды олдат. Ма омщаладем ма рут мувем Зелёный Яр. Тата сэмна питсат ма ащилам, тата ол ма семьяем.

Данил Русмиленко,
Зелёный Яр

Рут мувицем

Ма сэмна питсам па олдам ай похална. Лув даял ям пелак ёхан Полуй пела, нэмад лув Зелёный Яр. Щит сэңк ям пелак мув. Тата ям мур лэпат сам нэңхет олдат, хоятат луведал асат оцдалал, аса нятлат кут кутланна.

Муң ай похлувна ямас олты ораңна, мада масл ки, аса ол. Лапкайна иёлттыи олдат ям дытатат,



Хор: Вера Лонгортова



Сумат нув

Хор: «ЛА» архив

Ёхан тайна йи урхот лойс. Имеңан-икеңан щита устан. Пох па эви тайсаңан. Похан кашң хатл шахар мохалтал, вой велман яңхал. Ёханна подна худ ведал. Эван лэтот кавартал. Яйл ёнтасдалды. Юхал сэвардалды. Ацеңалал-аңкеңалад нуша ант уйтлатан, щиты щи улдатан. Похан велпаслаты тус, эван ёнтасты тус. Войн хун антам, худан хун антам. Щиты щи улдат.

Имолтына, хуван улты муват эвалт, хуван улты йиңкат эвалт мой ёхтас. Ләпат ухдап онас. Олаң ухална, вет нави хоптына кирам ухална, мойң ёх ун икел омасал. Кувцал нави, вайдал навет. Омасты тахтэл нави.

Вана ёхатсат, ухалдал ярсалдал. Вуцайт-павкат версат. Ёхи доңксат. Лэтэл-йинцтэл кут эвалт ун ики ясаң олаң щи вус:

– Ёхан тайң ики, мир нядам хув, мир ясаң хув. Хуват тайты хув ёхан овна омастэм, ултэм са-

хат айкел худсам. Матты ки наң хощаен, пидна туты довата ювам эви энаммал. Лув верты тус пормасал сый, хув тайты хув ёхан хуват шацтал. Тусаң кут эвалт тусаң ултал ёнтастыя. Ма вет похем кутна мет ай похем пилды ул. Наң эвен лувел пида тутыя муң щи ёхатсув. Наң па, Ёхан тайң ики, муй ястадан? Нәңен ки малан, муй хорпи тын мосал – щи хорпи тынна сохапталэм. Муй хорпи мит ки мосал – щи хорпи митна сохапталэм.

Ёхан тайң ики шай анал шувал холты унты опсас, охал нох адаммал кемна, нюхмас:

– Ийимем пурщаматы питса. Эвием ёдан лув куца. Лэтотал кавартал, юхал сэварал, сохал ёнтал, вайл ёнтал. Лувел ки мадам, ма хотсат улдам? Ийимем еша ул ёшал щёмлы питал, кураал щёмлы питал.

Ёхан овна омасты ики па щи ястас:

– Щи хуват мув элты ёхатсув, войлув хащ керысат. Талты хоты хотсат ёхи манлув? Эвиен халэват унты ант вантылаңал ханши ки эватал – муң лувел там тал ант тулэв. Илэм тал па ёдан ат ул.

Нын па щи сус похан нәңан тувалан. Ант вантылаңал ханши ант ки эватал, халэват додамман тулэв. Вантлэв-сары, яна педа щи доват тус.

– Лукашал, щиты ат ул, – Ёхан тайң ики нюхмас.

Идая йис. Мохет ил олсат. Туп Ёхан тайң ики эви век ил ант войпла. Иса нумасал, муй хорпи ант вантылаң ханши эваты. Щиты нопсал тыед-тохел поныдытал сахат щи нумалмасды. Молхатал юх сэвартал сахат, юх сэварты хар путарна сумат лойс. Щилта йи нув ил ракныдыйс. «Щи нув хорас ханши ки эватлэм, ал таңха, ант вантыдыса?»

Алаңсахат Ёхан тайң ики эви алаң нох кидас. Лэтот кавартас. Мойң мохет лэвмел-йинцмел юпина, Ёхан

тайң ики эви ханши эваты щи опсас. Хатдал кутпа ант ёхтас, ханшел етшас. Щиңанца ханшел мойң мохетна па вантты, арталаты питса. Яна-па, елпи ант вантыдыйм ханши улмал. Ёхан оваң икина щи инце-маса:

– Эвийе, тамаш ханши хорас наң холца шияласэн? Тус эвалт тус нәңемна ант моштаса.

– Молхатл, юх сэварты харна юх сэвартем порайна сумат нув ил ракнас. Лув хорасал ханшия эватсэм. Нэмад – «Сумат нув».

– Яна-па, тус нэ улмен, – Ёхан оваң ики ястас. – Илэм тала ёхи хаща.

Ёхан тайң ики эви самал амтас. Сэма питам лот эвалт нэмомты холта ант яңхилдымал антам па, щипна шеңк палтам. Па хоят мувна, па мохет хотна – хойна лаялда, хойна щалитла? Щиты ёдан хащас.


Тал сус яйел нәңан тусэл. Нётты па хот тайты хоят этас. Кимет тал Ёхан тайң ики эви туса. Ин там унты Ёхан оваң ики ай пох хоца ултал шацал. Тайты сохдал хорам ханшина ёнтман. Щи ханшет кутна – «сумат нув» нэмпи ханши па ултал.

Геннадий Павлович Кельчин
монцас
Алина Тоярова нэпека
ханшсалды



Хор: ugra-news.ru

Хор: Вера Лонгортова



Сәмлэх-пәллэх пырәс ИКИХӘН-ИМИХӘН

Унт лор тылаш 1996-мет талан Иосиф Иванович Сопочин (1958-мет талан сәма питас) элгы ханшилыса. Лув ши порайн Тромьёган Вёқи рап йәвөн хоша сус куртан ус. Шита ханшильым потар Будапешт вошан ай тахайт потты тылашан 2010-мет талан нәпека лэщатса. Людмила Николаевна Каюкова там рупата ширанишинёгас. Юхат моншаңху эвел Олеся Иосифовна Сопочина онтасан 2011-метан рупата еллы олнитса. Мет олаңан венгерской па английской ясҗата Марта Чепреги толмашсаллы. Шалта ханты ясаңан па эсалса.

Әй мәта латнә ими қоләхсаҳән вәлләхән. Ту ими қоләхсаҳән вәлтын, тақа, қылхәл қул-войәх кәнчә лөвәтхә-қөлхә йәх. Тақа сәх пән тайлхән. Ту қылхәл тақа сәх пән лотәлөмин йәңқиләл. Сәх пән лотәлтыннә, әнәмта пәнчә қә, мұв қөв әнмәл, ти йәңқталнә ими курһахләхәләл, қылхәл тақа әнәл қөхә йәх. Әнәмта пәнчә қә, мұв қөв әнмәл. Тәлилта-толилта мәвләмтәтә лөвәтхә йәх.

Әй мәта латнә имил һавмиләл:

- Ти сәх пөнымәны ылә вәлтә пәләкнам ал мәна лөвәт! Ти сәх пөнымәны ылә вәлтә пәләкнам йәвөн сохит әнтә мустәл. Ыл пәләкнам ал мәна, лөвәт, - имил лүватынам һавмиләл.

- Төхәнә, төхәнә, әнтә мустәл кунтә, әнтә, ма мұват мәнләм.

Йа тәм мәта вәлталнә өнтәлнә нөмәқсәхәл, сәх пән лоттә йәңқилталнә: «Лүв әнта имәм (йәм мәта тохи вәләл) тәнә һавәмталнә лүв мант мұв вәр пәтан әнтә әсәлл. Әнта йәм мәта Қуләң-Войәх Қон тохи вәләл, йәм мәта войәх-қул вәлтә тохи, ма ивәлтәм қәһитәл. Ту вәр пәтан мантәм йастәл. Сә-сәр, - тәм мәта қатәл нөмәқсәхәл, - сәр ма ту пәләкнам йәңқилләм. Йәмнам мұвәли ма ивәлтәм қәһитәл. Тақа аңкәнөш имәм ма ивәлтәм қәһитәхәлта чүксәмәх, ма ту пәләкнам йәңқләм».

Панә тақа ту пәләкнам ти мән. Ту пәләкнам сәх пән лотта мән. Ту сәх пән лотта мәнмал: «Сәр тақа пөнам пәрһинам лотләм. Сәр ит ту пәләкнам йәңқләм, ыл



Хор: Shutterstock. Tagwaran

пәләкнам йәңқләм, имәм йастәм пәләкнам».

Йа тақа әнта, мұв қөвәпты мән, әнта мұв ванәпты мән, чөкәпә қөвәт әнтәм вәләл, тақа тәми ләйәлл, қот төттә омәсл. Тәми әй қот, йәмат олқасхә йәхәм қот, һир наңкәт таләм қот. Тәми йәмат олқасхә йәхәм, роқәнта қот кима йәх. Олқас қот тәми төт омәсл. Тәми ләйләхәл тақа, най муләм, мәтә пәрһәли әтәл.

Тақа күрһахләх, өвпи һатәләккә йәкә ти пунчәх, өвпи һатәләккә пунчәх, йәқәнам күч иңлаһтәх, тәми йәқән утә оләңнә имихән-икихән әлләхән. Тәми йәмат сәмхәл кәласхә йәхәм имихән-икихән утә оләңнә, қот йәчәнә тәми төт әлләхән. Тақа һатәләккә өвпи кәтәлнат пунчәх, әй кәтәлнат тәвәртәх. Чүч өвтыя һатәләккә ыл ымәл. Қәта, қөты йәхиләхән? Тәми вәр күч арйалта йәх, лүват әнтә вутын қөрасәп. Әй мәта қуйнә пә әнтә вутал қөрасәп.

Һул ләқипәлләхән, имихән-икихән усипәлләхән.

- Тәми өләң қатәл йәчәхә йәх, ими? - һавмиләл.

Ими һавмиләл:

- Тақа, қатәл йәчәхә йәх.

Ики һавмиләл:

- Нүң, ими, лита йәхән?

- Тақа лита йәхмам сәтәл, - ими һавмиләл. - Тақа нарқасләлмән төхән кунтә.

Тақа ики һавмиләл:

- Өңқйух тәвләка вәтимтә тақа!

Өңқйух тәвләк иминә вәтимты, ики һавмиләл:

- Йа, әнтәпа нөқнам қот төйнам! Ма нарқасләләм, - тақа ики нарқасләта ти йәх. - Мұвәли тылмән тақа вутан? Қөләм оли қор вохләмән.

Тақа ики нарқасләта ти йәх:

- Қөләм оли-йа

вәли қор-а,

тәхә рөмәса-а,

тәхә қөмәса-а!

Тақа мұв тәттың-пәләң пәвәттә ләви, мұв вәтәң-пәләң пәвәттә ләви, тәми ики нарқасләтән кәм қот қөны иңләхләхәл. Тәми қор мұв тарәм вәтнә, мұв тарәм қумпәтнә, тәми қот қөн йәчәнам алә талли нарқасйухнә.

- Қөләм оли, - йас тәл, - вәли қор тәхә ромәса, тәхә қөмәса.

Әй ванхәнам йүтә сохит қот қөн йәчәнам әнтәпнә әй пыч қаләқинты. Ти әнтәп иминә вәйи, қот пәлә йәчәнә имихән-икихән тақа қор қөртә йәқән ти чүксәмхән.

Лүв омәсл, төхнам ләйәлл. Тақа ти омәсталнә төхнам ләйәлл, лүват әнтә вутын қөрасәп. Ими пиртымты өңқйух тәвләк вәтимтәта, ту лапәт пәлнәп, қут пәлнәп әнәл сор, тақа ту қор һамрәхән төхә нык ти мөли.

Тәм аңкәнөш, ләйәлл, қор йәмат вәйәң қор, йа пут кәвәртәнә йаңк вәрта қә ти чүксәмәх. Пут утә ти вәйи тақа, лита йәқән ти чүксәмхән вәлә йәчәнә. Тақа ими қоләх йаңк вәр, панә вәйәң һавит әйнам йаңка ти картәлал. Йаңкәл тәкәнта картәтәх. Тутәлнат өс лүв лив. Лүвә лита ымәл.

(Еллы па ул)

Аграфена Сопочина
ханшсәллы

<p>Газета «ЛУХ АВТ» Адрес редакции: 629003, ЯНАО, г.Салехард, мкр. Богдана Кнунянца, д. 1, каб. 106 +7 (34922) 4-68-63 E-mail: luh.avt@yamal-media.ru</p>	<p>Учредитель Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д. 9, каб. 708)</p> <p>Газета зарегистрирована Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО 19 апреля 2012 года Регистрационный ПИ № ТУ72-00558</p>	<p>Тираж 1300 Заказ 45 тз Подписные индексы: на год - ПА700, на полугодие - ПР561</p> <p>№ 9 (1312) Газета вышла в свет 28 февраля 2026г. Подписано в печать 26 февраля 2026г. по графику: 16.00 фактически: 16.00 Газета выходит по субботам</p> <p>Цена годовой подписки 88 руб., в розницу не распространяется</p>	<p>Издатель Департамент внутренней политики ЯНАО (629008, ЯНАО, г.Салехард, пр-кт Молодёжи, д. 9, каб. 708)</p> <p>Отпечатано в АНО «Ямал-Медиа» Юридический адрес: 629003, Ямало- Ненецкий автономный округ, г. Салехард, мкр. Богдана Кнунянца, д. 1, каб. 106 Фактический адрес: 629007, Ямало- Ненецкий автономный округ, г. Салехард, ул. Чубынина, д. 39А</p>	<p>Генеральный директор АНО «Ямал-Медиа» Зулинова Марья Андреевна</p> <p>Главный редактор Яковлева Аллина Кирилловна</p>
---	--	--	---	--